



9. marts 2012

FM2012/66

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Illunik nioqquteqartarnerup naleqqussarnissaa pillugu inatsisiliornermut atatillugu illunik tunisinermi illup pitsaassusaata nalunaarusiuunneqartalernissaanut atatillugu pitsaaqutit akorngutillu misissorneqartarnissaasa inatsisitigut atuuttussanngortinneqarnissaat kiisalu illut nukissiuutitigut nalunaaqutsertarlernissaasa inatsisitigut piumasaqaatigineqartalernissaa pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuinermit atatillugu aamma sillimmasiisarfiit piginnittut nikinnerannut atatillugu sillimmasiisalernissamut peqataatinneqartarnissaminnik piumasaqaataat naliliiffigineqartussaavoq.

(Inatsisartunut ilaasortaq Justus Hansen, Demokraatit)

Tungavilersuut

Demokraatini isumaqarpugut, pitsaassasoq ilaqutariinnut illut tunineqarnerannut atatillugu inatsisitigut piumasaqaataasumik illup pitsaassusaa nalunaarusiuunneqartalertuuppat, taamaasillutik pisisut takusinnaalissavaat, illut sunik akornguteqarnerosoq amingaateqarnerorlu.

Innuttaasut amerlingaluttuinnartut illusisalernikuupput, tamatumunngalu atatillugu Demokraatitut pingaaruteqarpoq, pisisup pisinermut atatillugu ersarissumik paasiuminartumillu illup qanoq inneranik paasitinneqartalernissaa.

Illup pitsaassusaa pillugu nalunaarusiaq ilinniarsimasup naliliinerisassavaa illu, illunut allanut taamaaqataanut naleqqiullugu, qanoq pitsaatiginersoq. Illup ajoqutai illup atorsinnaaneranut innarliisut imaluunniit illup nalinganut malunnartumik apparsaasut nalunaarsorneqassapput. Aamma nalunaarsorneqassapput ajoqutit imaluunniit allat illumi ajoqutit, kingusinnerusukkut illup ajornerulerneranik kinguneqarsinnaasut. Nunami maani annertuumik oqummik ajornartorsiu-teqalersimaneq tungavigalugu aamma illup isungutassusaa nalunaarummut ilanngunneqartalertariaqarpoq.

Illup pitsaassusaa pillugu nalunaarut allatut oqaatigalugu uppersaataassaaq, pisisussap illumik pisinissaminut piareersimanerluni naliliinermini iluaqutissaa.

Qularutigineqarsinnaassanngimmat, illup pitsaassusaanut nalunaarusiorneq illumik pisinermi akitsorsaataasusaaq taava periarfissaasariaqarpoq pisisussap nalunaarusiortoqarnissaanut itigartitsinnaanissaa. Taamatut pisoqartillugu erseqqissaatigineqartassaaq, piginnittuunerup allanngorneranut atatillugu sillimmasiissummik pisinnaaneq pisinnaajunnaartoq.

Siunnersuutigineqartutut misissuisalernissami aamma erseqqissarneqassaaq, inissiat pitsaassus-
aasa aamma nalunaarusiuunneqartalernissaat ilanngunneqartalertuuppat iluaqutaassanersoq.

Pitsaassutsimut nalunaarusiornermi aningaasartuutit tamakkiisumik tunisisup akilertassavai.

Pisortanut aningaasatigut allaffissornikkullu kingunissai

Naatsorsuutigineqassaaq inatsisiliornermut atatillugu pisortat aningaasartuuteqarnissaat. Aamma naatsorsuutigineqassaaq siunnersuutip kinguneranik suliffinnik ataavartunik pilersitsisoqaru-
maartoq, pisariaqartinneqalersussaammata illuliornermut immikkut ilisimasallit illup pitsaassus-
aa pillugu nalunaarusiorsinnaasut. Qularnanngilaq immikkut sanaartornermut ilisimasalimmik
nalunaarusiortussamik toqqaasarnissamut aaqqiissuussinerup kinguneranik aningaasartuuteqar-
toqartassasoq.

Namminersorlutik Inuutissarsiortunut aningaasatigut allaffissornikkullu kingunissai

Naatsorsuutigineqassaaq namminersorlutik inuutissarsiortut siunnersuummik iluaquserneqarnis-
saat, illuliornermut immikkut ilisimasallit illup pitsaassusaa pillugu nalunaarusiorsinnaasut pisa-
riaqartinneqalersussaammata. Aammali namminersorlutik suliffiutillit sanaartornermut immikkut
ilisimasallit illup pitsaassusaanik nalunaarusiortalertussat pikkorissarnissaannut ilinniarteqqinnis-
saannullu aningaasartuuteqarnissartik naatsorsuutigisariaqassavaat.

Innuttaasunut aningaasatigut allaffissornikkullu kingunissai

Illunik pineqartunik tunisisut naatsorsuutigissavaat tunisinermut atatillugu aningaasartuuteqar-
nerusalernissartik, illup pitsaassusaanut nalunaarusiornermi aningaasartuutit amerlaqataannik.
Danmarkimi illup pitsaassusaa pillugu nalunaarusiorneq 4.000 koruunit aamma 10.000 koruunit
akornanni akeqakkajuppoq. Illup pitsaassusaa pillugu nalunaarusiornermut aningaasartuutit
qularnanngilaq illup pisiarineqartup akianut ilanngunneqartarnissaat.

Taamatut oqaaseqarlunga qilanaarpunga Naalakkersuisut akissutaata tusarnissaanut kiisalu partiit
allat saqqummiussassaannut.